


明

書

二





書

明

(一)

纂 麟 維 傳

# 明書卷五十七

## 志六

### 禮儀志二

#### ○講讀

#### 經筵儀

凡御經筵。敕勳臣一員知經筵事。內閣學士或知或同知。大九卿及學士講讀官侍班。翰林院官爲講官。及展書官。科道官侍儀。鴻臚錦衣官供事。鴻臚官贊禮舉案。勳臣或駙馬領將軍侍衛。禮部擇吉題請。先期於文華殿設御座。設御案於御座東稍南。下設講案。先置所講四書。經史。四書東。經史西。先期翰林官撰講章送內閣進覽訖。預置講章於冊內。是日蚤。上詣文華殿左室展讀先聖先師。遂御文華殿。知經筵等官於丹陛上行五拜三叩頭禮畢。以後止行叩頭禮。以次上殿侍立。執事官舉御案置御座前。舉講案於正中。東西展書官從本班出。進至御案南銅鶴下。東西向立。叩頭畢。東班展書官進詣御案前跪展四書畢。起退立鶴下。東班講官一躬進。至講案前立講畢。稍退。展書官詣御案掩書畢。西班亦如之。贊講官叩頭畢。俱入班。遂舉御案及講案於原處。贊禮畢。命賜酒飯。各官跪承旨。退至丹陛。行叩頭禮。至左順門。

酒飯畢。入行叩頭禮。上還宮。遇忌辰。各官具青綠公服。春以二月十二起至五月初二止。秋以八月十二起至十月初二止。不必題請。

日講儀

凡日講。上常服御文華穿殿。止用講讀官內閣學士侍班。不用侍衛侍儀等官侍班。講讀官入。行叩頭禮。東西分立。先侍上讀四書。次或讀經。或史。每本十數遍。後講官先講四書。次經史。務在直說大義。明白易曉。畢。侍書官侍上習書。畢。各官叩頭退。賜茶。或賜酒飯。茶在文華殿。酒飯在門。再講謝。

午講儀

上每日蚤膳畢。出御便殿。或文華穿殿。閣臣及講官日講畢退。上進煖閣。司禮監將各衙門奏章進上御覽。閣臣等退。西廂房伺候。上有所諮問。卽進至御前。將本中事情明白敷奏。覽本後。閣臣率領正字官恭侍上進字畢。若上欲再進煖閣稍憩。閣臣仍至西廂房候。若不進。閣臣遂率講官再進午講。或通鑑。或貞觀政要諸書。講官務將前代興亡事實直講明白。講畢各退。上還宮。後增講大學衍義。如日講儀。又於無逸殿講書。如經筵儀。

東宮初出閣儀

凡東宮講讀。初於大本堂。後於文華殿。或於便殿。或於文華殿東廂。初出閣。則是日侍衛侍儀如常儀。執事等官於文華後殿行四拜禮畢。鴻臚寺官請皇太子陞殿。執事官導引陞座。師保等官於丹陛上行四

拜禮。各官退出。內侍導皇太子至後殿陞座。以書案進。每日侍班侍讀講官入。分班東西立。內侍展書。侍讀講官以次進讀。講訖。命賜酒飯。謝叩頭而退。初讀講。閣臣連侍五日。以後每於三、八日一至。先後一拜禮出。然後各官供事。

### 皇太子每日講讀儀

凡遇每日蚤朝後。皇太子出閣陞座。內侍以書案進。不用侍衛等官。惟侍班侍讀講官入。行叩頭禮畢。分班立。內侍展書。先讀四書。則東班侍讀官向前伴讀十數遍。退復位。次讀經。或史。西班亦如之。畢。各官退。已時陞座。各官如初入不行禮。內侍展書先講。蚤讀書。東班進講畢。次經史。西班如之。畢。內侍收書。侍書官向前侍習寫字。務要端楷。畢。各官叩頭退。午後陞座。讀本日所授書。三日一溫。免授新書。凡寫字。春夏秋每日一百。冬五十。

### 諸王講讀書儀

凡諸王年應講讀書。堂在皇極門右廂房。侍讀講官選部屬或進士。改授翰林院官銜充之。講讀行禮如皇太子儀。但無侍衛侍儀侍班官。每日捧字做送。內閣圈註。皇太子及諸王呼侍讀侍講爲先生而不名。每年假日。聖節前後九日。千秋節九日。正旦。初一至二十。花朝。清明各一日。端午三日。七夕。中秋各一日。重陽三日。冬至前後五日。臘八一日。除夕前五日。凡風雨大寒暑則免。必請旨定奪。皇太子諸王同。

### ○軍禮

親征儀

凡天子親征。扈從監國。皆如巡狩事宜。先期祭告天地。皇帝服武弁。乘革輅。備六軍。以牲犢幣帛祭告。作樂行三獻禮。告太廟。同時享儀。告社稷。同春秋祭社稷儀。臨期。禡祭於國南羣神祠。及旗纛。凡過山川。皆有司具牲幣。皇帝或親祭。或遣官如儀。凱還。則皇帝率諸將。以凱樂俘馘陳於廟社門外。伺告畢。以俘馘付刑部。協律郎導樂以退。告祭如出師儀。宣露布。則皇帝服通天冠絳紗袍。陞午門樓上。以露詔天下。百官具朝服。與頒詔儀同。若論功行賞。則兵部具諸將功績。吏部具勳爵職名。禮部戶部具賞格。集六府閣部大臣。論定功賞。奏取旨。至日。上服袞冕。備鹵簿。全駕儀衛。百官朝賀。如大慶賀儀。宣制曰。朕嘉某等爲國建功。宜加爵賞。今授某以某爵或職。賜以某物。其共承朕命。大賚扈從。及從征軍士。詔告天下。

獻俘儀

凡獻俘。禮部先期示文武百官。具朝服。并坊廂里老人等。行慶賀禮。先一日。設御座於午門樓前楹正中。是日。設儀仗大樂。贊禮官承制官。宣露布官。展露布官。及刑部獻俘官。設進露布官。位於御道東。引禮官引捧露布官。捧露布置於案。退就位。獻俘將校。引俘列於午門前西邊武班之後。候上常服。御奉天門。鐘聲止。鴻臚寺官跪奏。請上陞輿。樂作。至午門樓上陞座。樂止。以後凡拜及進露布。樂作。止如常儀。鳴鞭。進露布官四拜。執事官舉案於中道。宣露布訖。四拜。移案於東。進露布各官退就位。贊獻俘。獻俘將校。引俘北向。五俘跪於前。刑部官詣樓前中道跪奏云。某官臣某奏云。某官以某處所獻俘。請付所司。候旨。傳下。

承旨訖。卽同將校押出施行。若上釋放。承制官請制。遂稱有制。所獲俘囚。咸赦其罪。宣旨曰。有敕釋縛。所釋俘叩頭訖。將校引去。百官排班致詞賀訖。行五拜三叩頭禮。奏禮畢。樂作。駕興。樂止。百官退。次日行開讀禮。第三日行上表慶賀禮。各如常儀。

### 宣捷儀

凡有各處宣捷。擇日宣捷。至日不奏事。鴻臚寺於蚤朝。將差來人役引至御前。宣奏捷音。是日百官具吉服。候宣捷之後。鴻臚致詞稱賀。行五拜三叩頭禮。卽日遣官薦告郊廟。行翰林院撰文。太常寺備祭品。中捷以下止宣捷。不行祭告慶賀禮。

### ○冠禮

#### 皇帝冠禮儀

凡皇帝應加冠之歲。前期擇吉日。工部製冕服。翰林院撰文。或用古辭。遴某官攝太師。某官攝太尉。旣筮日。遣官奏告天地宗廟。行一獻禮。告示文武百官於皇城守宿。蚤具朝服。行禮前一日。內官陳設御冠席於皇極殿正中。設冕服案於御冠席之南。餘儀仗侍衛侍班。陳樂如常儀。是日鼓初嚴。百官具朝服。鼓次嚴。百官列於午門。東西相向。鼓三嚴。百官以序入就班。東西相向。皇帝服空頂幘。雙童髻。雙玉導。絳紗袍。御輿以出。侍御導從。警蹕如常儀。皇帝將出。仗動樂作。陞殿卽御座。樂止。捲簾鳴鞭。雞唱報時訖。通班唱各供事執事官各就位。引禮引太師太尉先入就拜位。內外皆四拜。樂作。樂止。如常儀。引太師先詣盥洗。

位。搢笏盥手。悅手訖。出笏。引禮引太師太尉由西陛陞。引禮退就本位。太師太尉至殿西門內。贊引至御席西東向立。侍儀奏請加元服。退就位。太尉進就皇帝席前少右跪。搢笏脫空頂幘。櫛畢。設纚。出笏興。退立於西。物皆授受於內使。太師進御前。內使就案取冕立於太師左。太師祝曰。今月吉日。始加元服。壽考維祺。以介景福。內使捧冕跪授太師。太師搢笏加冕加簪纓訖。出笏興。退立於西。奏皇帝著袞服。皇帝興。著訖。就御座。贊進醴。樂作。光祿卿奉酒授太師。太師搢笏至御前祝曰。甘醴維厚。嘉薦令芳。承天之休。壽考不忘。祝訖。跪授內使。內使跪進上。上受酒。祭少許。啐訖。以盞予內使。樂止。以次受盞訖。出。四拜。三舞蹈。山呼萬歲。復四拜。禮畢。上興。樂作。入宮。樂止。百官退。皇帝改通天冠絳紗袍。入宮拜謁皇太后。如正旦儀。另日謁太廟。如時祭儀。百官具公服稱賀畢。賜宴於中極殿。

### 皇太子冠禮儀

凡皇太子宜冠擇吉。前期一日。遣官具特牲告廟。行一獻禮。錦衣衛設大駕如常。復設幕次於文華殿之東序。鴻臚寺設節案於殿內之北。正中設香案。設冠席於殿內之東南向。設醴席於西階上南向。內使張帷幄於東序內。設几案褥座。張帷於外。陳袍服皮弁服袞服圭帶舄等物於帷中。案上具翼善冠皮弁九旒冕。以盤盛紅袞覆之。設盥洗所。司尊所。司尊者實醴於尊。加幕。進饌者實饌於尊北。諸執事立其所。教坊司設樂。是日蚤。上具皮弁服御華蓋殿。鴻臚奏請陞殿。傳制遣官。百官各具朝服侍班如常儀。先四拜。傳制詞曰。朕皇子某冠。命卿等持節行禮。節將至。禮部官詣東序啓請皇太子迎節。樂作出迎門外。官持

節入置於案。退立於案東。樂止。導皇太子詣香案前。樂作。行四拜禮。樂止。持節等官立於洗盥之次。請皇太子就冠席。樂作。皇太子卽席坐。樂止。贊行初加冠禮。樂作。引禮引賓贊皆詣盥洗所。搯笏盥洗畢。出笏。樂止。賓贊陞自東階。稍西向立。內侍揭蓋袱。樂作。以盤捧翼善冠陞。賓降階一等受之。樂止。右手執冠後。左手執冠前。進席前立。祝曰。吉月令辰。乃加元服。懋敬是承。永介景福。樂作。賓跪進冠。興。贊者跪正冠。興。立賓後。樂止。禮部啓易服。皇太子入帷幄。易新袍服出。禮部啓復坐。行再加冠禮亦如之。祝詞曰。冠禮申舉。以成令德。敬慎威儀。維民之式。乃加皮弁及服。行三加冠禮亦如之。祝詞曰。章服咸加。飭敬有虔。永固皇圖。於千萬年。乃加冕袞。贊行醕禮。啓皇太子詣醕席。樂作。賓贊復盥洗酌醕。賓至席前。樂止。祝曰。旨酒孔馨。嘉薦載芳。受天之福。萬世其昌。畢。賓跪進爵。皇太子掬圭進酒飲訖。樂止。饌至如酌儀。出圭復位。啓皇太子詣受敕戒位。引皇太子降自西階。詣拜位。稱有制。贊跪。皇太子跪。宣敕戒曰。孝事君親。友於兄弟。親賢愛民。居仁由義。毋怠毋驕。茂隆萬世。樂作。俯伏興。平身。四拜。樂止。禮部官捧節出。樂作。皇太子送節至門外。引還東序。尋還宮。持節及賓贊宣敕戒等官復命。當日皇太子具冕服詣內殿。用樂行禮如常儀。畢。詣皇太后謝。上位前謝。中宮謝。俱行五拜三叩頭禮。次日蚤。上具皮弁服御中殿。奏請陞殿。百官具朝服稱賀。致詞曰。皇太子冠禮旣成。禮當慶賀。行五拜三叩頭禮畢。就詣文華殿。行賀皇太子禮。陳儀仗如常儀。

皇太孫冠禮儀 同前

親王冠禮儀

凡親王冠禮。大約同皇太子禮。但持節冠於王邸。初加翼善冠袍服。祝曰。惟茲吉日。冠以成人。克敦孝友。福祿來臻。次加皮弁。祝曰。冠禮斯舉。實由成德。敬慎威儀。惟民之則。三加冕袞。祝曰。冠至三加。命服用章。敬神事上。永保藩邦。進醴。祝曰。旨酒嘉薦。載芬載芳。受茲景福。百世其昌。宣敕戒曰。孝於君親。友於兄弟。親賢愛民。率由禮義。毋溢毋驕。永保富貴。其謁廟謁皇太后。父皇母后。俱行五拜三叩頭禮。謁皇妃東宮及妃。各行四拜禮。皆用樂。次日上常服。陞金臺受賀。王具常服詣奉天門前東廡坐。百官常服四拜禮。

○婚禮

皇帝納后儀

凡皇帝納后。選定前期。擇日。遣官告天地宗廟。前一日。奉天殿設御座。設制案節案。設中和樂於殿內。至期蚤。設鹵簿。大駕於丹陛。丹墀。禮部司官監陳禮物於丹陛上。及文樓下。設綵輿於奉天門外。陳大樂。俟鼓三嚴。鐘止。上冕服陞殿。導駕如常儀。陞座。文武官朝服叩頭訖。執事引正副使朝服行四拜禮。傳制曰。茲選某官某女爲皇后。命卿等持節行納采。問名禮。正副使又四拜。引禮引節制案及禮物至奉天門外。奏禮畢。上興。正副使取節及制書置綵輿。樂導出大明門。易吉服上馬。詣后第。后第設正副使幕。次於大門外。左南向。堂中設香案。節制案。使至門入幕。陳禮於堂。正副使取制書置案。禮官一員先入堂立於東。主婚者朝服立於西。禮官奉制建后。遣使行納采。問名禮。引主婚者出迎。正副使捧節及制書入至正堂。

置於案東西向立。主婚者四拜畢，跪宣納采制。主婚者受，以次置案左。宣問名制如前。置案右，俯伏興。平身。主婚者取表奉使臣，使臣跪受置案，俯伏興。平身退就拜位四拜，使臣出置綵輿。主婚者出大門外致詞云：請禮從者入酒饌畢，以幣帛勞使臣，送至大門，鼓樂迎還表。司禮監捧入復命，納采致詞曰：朕承天序，欽紹鴻圖，經國之道，正家爲本。夫婦之倫，乾坤之義，實以相宗祀之敬，協奉養之誠。所資維重，祇遵

太皇

太后

命，遣使持節，以禮采擇。問名制詞曰：朕惟夫婦之道，大倫之本，正位乎內，必資名家。特遣使持節

以禮問名。尙佇來聞。答表曰：臣某伏承嘉命，正使某官某等重宣制詔，問臣名族。臣女，臣夫婦所生，先臣某官某之元孫，先臣某官某之曾孫，先臣某官某之孫，先臣某官某之外孫。臣女今年若干，謹具奏聞。禮物則玄纁、紵幣、金銀、珠翠、生畜、果餅，有差。○納吉納徵告期。○竝同納采問名儀。但傳致詞曰：茲聘某官某女爲皇后，命卿等持節行納吉納徵告期禮。禮官女主婚者曰：奉制聘皇后，納吉制詞曰：大婚之卜，龜筮卿士協從，敬循典禮。遣使持節告吉，納徵制詞曰：卿女有貞靜之德，稱母儀之選，宜共承天地宗廟，特遣使持節以禮納徵，告期致詞曰：歲令月良吉日某甲子，大婚維宜。特遣使持節以禮告期。禮物則皇后所服御及幣帛、金銀、珠鈔、宮人、衣帽、執物、馬十二匹、生畜、果餅、茶酒，諸物有差。○發冊奉迎。○前一日，所司設樂及儀仗如常儀。至期蚤，內官設皇后幕次於內殿，南北向。設上與皇后各更服處於內殿，設制書案、節案、冊案、寶案於御座前。陳鴈及禮物於丹陛上。陳綵輿於奉天門外。陳設皇后鹵簿車輅於綵輿南。

其傳制發冊寶正副使俱如前納采諸儀。但改制詞曰。茲冊某官某女爲皇后。命卿等持節奉冊寶行奉迎禮。及正副使置節及制書冊寶於后第大門。入次候女官入奉皇后首飾褱服入中堂左。內官陳儀仗車輅等物於大門內。禮官先入。主婚者朝服出見。禮官曰。奉制冊后。遣使持節奉冊寶行奉迎。主婚者出迎。正副使節制書冊寶入。安置定。主婚者行四拜禮畢。退立於西南。女官以首飾褱服進皇后。內官進皇后儀仗於中堂。設女樂於堂下。作止如常儀。監官進前。正副使取節冊寶授之。仍前立於案東西。內贊引捧節冊寶官入置案上。皇后具服出閣。女官擁護詣香案向闕立。行四拜禮。宣冊。跪受冊。宣寶。受寶。摺圭出。主如常儀。又四拜畢入閣。持節監官出授正副使。使受節置案上。引禮引主婚者詣案前跪。聽宣奉迎制。宣訖授受如常儀。進鴈及禮物。復四拜畢。使持節出勞使皆同前。司禮監官嚴整鹵簿畢。達女官。女官奏請出閣。女樂前導。宮人擎執擁護皇后陞堂南向立。主婚者進立於東。西向曰。戒之敬之。夙夜無違。命畢。退東階西向。母進立於西。東向。施衿結帨曰。勉之敬之。夙夜無違。畢。退西階東向。奏請乘輿。皇后降階乘輿。侍從導從如儀。宮人乘輜從大明中門入。百官朝服於奉天門立班。過乃退。輿輅至於午門。鳴鐘鼓鹵簿止。正副使以節授監官。先入復命。捧冊寶傘扇儀仗。女樂前導。宮人擁護皇后輿由奉天門進內殿。幕次捧冊寶者授女官。皇后出輿。由西階上。由東階降迎。揖皇后入內殿。上於更衣處。具衮冕。皇后更禮服。同詣奉先殿行禮。先以冊寶置皇后宮中。奉先殿上東。皇后西。行禮如常儀。祭畢。還宮。禮物則紵幣冠服。冊駕鴈羊酒果有差。○合巹。○謁祭畢。設於正宮殿內。設上座於東。皇后座於西。置酒案於正中稍南。

上易皮弁服。皇后易公服。陞座。進酒進饌畢。女官取盞盞二。酌酒合和以進。易飲訖。上及皇后易常服入內室。皇帝從者餽皇后之餘。皇后從者餽皇帝之餘。○朝見兩宮。○第二日蚤。上冕服。皇后禮服。詣某宮某宮朝見。四拜如常儀。其日具股脩盤。立皇后左。拜畢。設案於某宮前。宮人以盤授皇后。皇后置案上。執事者進案。又四拜。舉盤案於西。禮畢各還宮。○謝恩。○第三日蚤。上冕服。皇后禮服。詣某宮行八拜禮訖。詣內殿。候上易皮弁服陞座。皇后行八拜禮。皇后還宮陞座。內親屬行八拜禮。次六尚女官。次各監局。俱八拜禮。上受皇后謝恩禮畢。出御奉天殿。具服頒詔行禮如常儀。○受賀。○第四日。百官上表慶賀如常儀。有親王先於華蓋殿行八拜禮。王退。執事官行禮。餘如常儀。親王詣某宮前。皇后前。俱行慶賀八拜禮。是日某宮陞內殿。受內外命婦慶賀禮。外命婦進表。皇后禮服陞內殿。受賀進盞。各如常儀。○盥饋。○第五日蚤。尚膳監具膳羞。皇后詣某宮。俟膳畢。贊引引皇后詣前。四拜。尚食以膳授皇后。皇后置於案。復位。四拜興。退立於西南。俟膳畢。出還宮。

### 皇太子納妃儀

凡皇太子納妃。與皇帝儀同。惟宣制曰。茲擇某官某女爲皇太子妃。命卿等持節行納采問名禮。後則曰。茲擇某官某女爲皇太子妃。命卿等持節行納徵告期冊封禮。凡行出持節。俱從各左門出。東西長安門。先親迎行醮戒禮。先設皇太子幕次於中左門前。上御殿如常儀。執膳內官先備金爵果盒於殿外候。鴻臚具朝服并東宮侍從官先入文華殿候。皇太子出行叩頭禮。導從皇太子由奉天左門入至幕次。具衮

冕候。鼓三嚴。上服通天冠絳紗袍御座。百官吉服行叩頭禮。導引皇太子出幕次至東陛下。侍從官止贊。引導皇太子由東階至丹陛拜位。四拜。引皇太子由殿左門入。就醺戒位跪。搢圭受爵。啐酒進饌。如儀。出。圭。上命之曰。往迎爾相。承我宗事。勛率以敬。皇太子曰。臣謹受命。俯伏興。平身。出就拜位。復四拜。上還宮。皇太子就幕次易服。樂作。樂止。皆如常儀。其時妃受醺於家廟。父命之曰。爾往大內。夙夜勤慎。孝敬毋違。母命之曰。爾父有訓。爾當敬承。親迎則妃家設皇太子幕次於中門之外南向。設香案奠鴈案於中堂。儀仗輿輅侍從備具。皇太子至幕次。禮官入曰。皇太子奉制行親迎禮。遂引主婚者出迎皇太子。皇太子先行。內官捧鴈隨。主婚者隨至中堂。主婚者進立於左。妃母立於右。女執事引妃出房。立妃母下。內官引皇太子至案前。內官跪進皇太子奠鴈訖。皇太子稍退。主婚者於案前行八拜禮。退復位。撤案。皇太子先行。至中門。女轎夫舉鴈轎至中門內。女官引妃出。皇太子詣轎所揭簾。妃陞轎。皇太子陞輅前行。妃具儀仗。後行。由東或西長安門進。至午門外。車駕儀仗侍衛官舍皆正妃儀仗。入左順門內。皇太子先至幕次。妃至轎止。內官跪請皇太子揭簾。妃降轎。皇太子前行。內執事以帷幕擁護妃行。俱步入左順門內。皇太子陞輿。妃陞轎。至宮門外。皇太子候妃至。入幕次行合巹禮。而皇太子動止。皆內官跪啓請焉。其合巹相見。謝恩。廟見。慶賀。皆如常儀。第慶賀則致詞曰。某官臣某等。恭惟皇太子嘉禮既成。益縣宗社隆長之福。臣等不勝忻忭之至。謹當慶賀。及命婦朝賀致詞。則曰。某夫人妾某氏等。恭惟皇太子嘉聘禮成。益縣景福。妾某氏等謹當慶賀。皇太后及中宮皆賜宴。而禮物皆下天子一等。

## 親王婚禮儀

凡親王婚禮約同皇太子納妃儀。但盟饋後王與妃見東宮。王具皮弁服。妃服翟衣。詣東宮前行四拜禮。東宮服皮弁服坐受。東宮妃翟衣立受兩拜。還兩拜。次日行回門禮。內官先將禮物至妃家。王與妃儀仗導從如常儀。王先行至妃家。妃父出迎。王先入。妃父從之。至正廳。王立東西向。妃父立西東向。王於妃父母前行四拜禮。妃父母受兩拜。答兩拜。凡親屬見王行四拜禮。王坐受。妃至。入中堂見父母行四拜禮。父母正面坐受。親屬見妃行家人禮。其禮物皆下皇太子一等。加媒人幣紵。回門則銀幣、羊酒、果盒有差。而醮戒之詞則曰。往迎爾相。用成厥家。勉率以敬。爲國之光。而受戒於皇太后或皇后。則曰。往迎爾相。承厥家事。勉率以敬。無忝戒命。

## 公主婚禮儀

凡公主下嫁。謁廟受冊。具日辭。奉先殿受醮戒。戒詞隨意。皇帝、皇后前各四拜。醮戒畢。復各四拜。駙馬之父母亦醮戒。駙馬於家告祠堂畢。便服上馬。行親迎禮。具儀從鼓樂。至午門西下馬。至朝房。具朝服序班。引由午門西角門入。至右紅門。內官接引至內使監前。候報公主受醮畢。引駙馬至右門西。東向立。公主易燕居冠服。命婦送至宮門。引禮引公主自宮門東門出。過宮門西上陞輦。至右門內。公主降輦。駙馬揭簾。公主陞輦。內使備儀仗鼓樂前導。合女樂三十六人引至府。公侯百官命婦送至府各歸。駙馬候公主至。揭簾。公主降輦。同謁祠堂。凡高曾祖考妣前。皆獻爵讀祝兩拜。行合卺禮。相對兩拜。饌及合卺畢。復兩

拜。遂見舅姑。舅姑坐於東。西向。公主立於西。東向。行四拜禮。舅姑答兩拜。駙馬送國學教習。

○宴禮

大宴儀

凡大宴於皇極殿。錦衣衛設黃麾於殿外之東西。金吾衛設護衛官二十四員。教坊司備九奏樂歌於殿內。設大樂於殿外。立三舞雜隊於殿下。光祿設酒亭於御座下之西。膳亭於東。珍羞醢醢亭於酒膳亭之東西。設羣臣四品及應在殿內與特恩賜殿內座於東西。設羣臣酒尊食卓於殿外。設五品以下位卓於東西兩廊。羣臣殿外東西相向立。奏請駕自右順門至奉天殿丹陛。大樂作。陞座。百官四拜。樂止。復作。光祿官進御筵。內官捧案進膳及進花酒訖。樂止。教坊跪奏一奏上萬壽之曲。侑食。樂作。內官捧酒進。贊跪。百官皆跪。教坊司跪奏進酒。贊俯伏興。平身。樂止。以後樂作止如之。贊各就位。百官就位。簪花訖。隨飲饌。教坊司跪奏平定天下之舞。舞畢出。二奏仰天恩之曲。樂作。進酒。迎湯。導湯。捧湯。進湯。贊饌成。撤湯。樂止。後作止皆如之。奏黃童白叟鼓腹謳歌承應舞畢。奏撫安四夷之舞畢。三奏感地德之曲。進酒。湯如前儀。奏車書會同之舞畢。四奏民樂生之曲。進酒及進湯如前儀。奏表正萬邦之舞畢。五奏感皇恩之曲。進酒。進湯。膳如前儀。奏天命有德之舞畢。奏纓鞭德勝蠻夷隊舞。承應畢。進致語畢。百官復四拜。禮畢。

凡中宴。禮儀同大宴。但進酒七爵。

凡常宴同大宴。但百官行一拜三叩頭禮。進酒或三或五爵。

凡坐位及論品外。其翰林院修撰等官。給事中御史。凡近侍風憲者。列丹陛下之東西稍北。張真人不與宴。賜饌與之。法王佛子國師禪師俱於大慈恩寺宴。內官一人侍之。

凡宴先畫坐次。懸長安門。有錯亂諠譁。糾儀御史糾之。

凡宴期如慶成。正旦。冬至。萬壽聖節。落成。皇太后壽誕。東宮千秋。立春。元宵。四月八。端陽。重陽。臘八。纂修。大臣考滿。進士恩榮。武舉會武。免宴則賜錢及鈔錠。

### ○傳制進呈頒降

#### 誓戒儀

凡大祀前三日陳設如常儀。百官各具朝服詣丹墀拜位。鐘聲止。御殿執事官叩頭請陞殿。作樂。鳴鞭。各如常儀。百官行四拜禮。傳制官詣御前跪奏傳制。由東門出至傳制位。稱有制。百官皆跪。宣制曰。洪武某年正月某日。大祀天地於南郊。爾文武百官自某日爲始。致齋三日。其敬慎之後。改分祀。則曰。某年十一月某日。祇行大祀。皇天禮於圓丘。爾文武百官自今日爲始。致齋三日。其宜精白乃心。益加敬慎之哉。傳訖。俯伏興。平身。復四拜。禮畢。上還齋宮。

#### 遣祭儀

凡遣官祭祀。前一日陳設如常儀。其日與誓戒儀同。百官行一拜三叩頭禮。分班。引獻官詣拜位。獨四拜。傳制如儀。宣制如祭孔子。則曰。某年月日祭至聖先師孔子。帝王則曰。先聖歷代帝王。命卿行禮。俯伏興。